

## POBJEDNICI PROJEKTA „GRAĐANIN“: „Bez brige, glasaj za e-knjige“

Dana 19.03. 2018. godine, u prostorijama Prve gimnazije u Zenici, održano je školsko takmičenje iz predmeta Demokratija i ljudska prava na nivou trećih razreda. Svaki razred je predstavljalo po osam učenika, koje je ocjenjivala komisija u čijem sastavu su bile profesorice Ismira Žilić i Ćazima Ćaušević te profesor Vehid Smriko.

Pobjedu su odnijeli učenici III 1 sa temom „Bez brige, glasaj za e-knjige“.

-“Projekat građanin” je jedan izvrstan oblik obrazovanja iz Demokratije i ljudskih prava za sve mlade ljude koji žele da se aktivno uključe u rješavanje problema u svojoj zajednici. Kroz ovaj projekat mladi mogu naučiti kako treba da se ponašaju kao budući građani u demokratskom društvu, te koja su to znanja i vještine presudni za uspješno rješavanje problema u našoj zajednici, kazala je jedna od predstavnica razreda, Amila Mehić.

Problem udžbenika je jedan od onih koji se protežu iz generacije u generaciju i za koji se ne poduzimaju adekvatne mjere za rješavanje. Učenici III 1 su jednoglasno odlučili temu te dali svoju ideju rješenja ovog problema.

U saradnji sa profesoricom Demokratije, Jasminom Delić, učenici su podijelili projekat u četiri faze te pokušali da pronađu najbolje rješenje za ovaj problem.

U prvoj fazi detaljno su objasnili problem koji učenici imaju sa udžbenicima na nivou srednjih škola Zeničko-dobojskog kantona, kao što su: neadekvatan odabir udžbenika, veliki broj nepotrebnih dodatnih udžbenika iz različitih predmeta, netačne i zastarjele informacije kao i gramatičke greške, te finansijski i zdravstveni problemi učenika. Smatraju da se zakon, koji postoji, ne primjenjuje na odgovarajući način i da je potrebna promjena.

Učenici su intervjuirali direktora naše škole, Ilijasa Hodžića, profesorice Merimu Husejinspahić i Feridu Ćorović te razgovarali sa stručnim saradnicima u Ministarstvu obrazovanja, nauke, kulture i sporta Selvedinom Delićem i Slađanom Matkovićem. Na osnovu njihovih stavova i mišljenja došli su na ideju uvođenja digitalnih udžbenika (e-udžbenika). To bi bila elektronska verzija udžbenika koja bi sadržala multimedijalne dodatke: fotografije, video i audio zapise, 3D animacije i sl. Učenici bi mogli sami da označavaju i podvlače lekcije te bi na takav način podsticali kreativnost te olakšali prilagođavanje gradiva različitim stilovima učenja. Učenje bi postajalo zanimljivije i zabavnije.

Temu „Bez brige glasaj za e-knjige“ komisija je proglasila najboljom, te su se učenici III 1 plasirali na općinsko takmičenje koje će se održati 24.03. u Osnovnoj školi „Skender Kulenović“. Našu školu će predstavljati učenici Denial Omerbašić, Amila Mehić, Elmin Marevac, Adisa Krkić, Tarik Valjevac, Selman Patković, Faris Ćolaković i Tarik Mujkić. Učenicima želimo puno sreće i uspjeha na općinskom takmičenju.



